

Pakar: Polemik sejarah hanya usaha pertahan ideologi Umno-PAS
The Malaysian Insider
03 Oktober , 2011
Oleh Mohd Farhan Darwis

KUALA LUMPUR, 3 Okt — Polemik berkaitan sejarah perjuangan kemerdekaan negara, yang menjadi isu hangat lebih sebulan baru-baru ini, hanya satu penentangan antara Umno dan PAS dalam usaha menegakkan ideologi politik masing-masing, kata pensyarah Universiti Pendidikan Sultan Idris Dr Muhaimin Sulam.

“Umno ada ideologi politik sendiri, begitu juga PAS. Dalam mempertahankan ideologi masing-masing terhadap isu kemerdekaan negara kita,” kata beliau pada wacana rakyat bertajuk “Merdeka: Sejarah Yang Dihitamkan” di Kolej Universiti Islam Zulkifli Muhammad, Taman Melewar malam tadi.

Menurut beliau, adalah lebih penting sekiranya kedua-dua pihak tidak bertelingkah, sebaliknya berusaha memperbaiki kekurangan yang ada dalam sejarah negara.

“Ini hanyalah pertelingkahan politik dan lebih baik sekiranya kita tidak hanya memandang kepada isu politik sahaja. Sebaik-baiknya fokus kepada isu yang lebih penting seperti pembangunan sosial dan sebagainya,” kata ahli panel ini.

Justeru, beliau menekankan mentaliti pembaca sejarah itu sendiri yang mencorak pemahaman terhadap isu perjuangan kemerdekaan negara dan mahasiswa memainkan peranan penting untuk mencabar ideologi yang dominan.

Isu berkaitan menjadi polemik dan kontroversi apabila Timbalan Presiden PAS Mohamad Sabu menyentuh peranan Ahmad Indera atau dikenali sebagai “Mat Indera” dalam satu ceramahnya di Padang Menora, Tasek Gelugor pada 21 Ogos lalu.

Beliau berkata peranan Mat Indera juga perlu diambil kira dalam senarai pejuang kemerdekaan negara, tetapi ramai mengancam beliau dan membuat laporan polis.

Kemudian ia membawa kepada pihak berkuasa mengenakan tuduhan ke atas beliau yang turut dikenali sebagai “Mat Sabu” di Mahkamah Sesyen Butterworth — membuat tohmahan yang memburukkan nama baik anggota polis dan keluarga mereka yang terlibat dalam serangan ke atas Balai Polis Bukit Kepong pada 23 Februari 1950.

Mohamad, 57, mengaku tidak bersalah dan minta dibicara terhadap pertuduhan mengikut Seksyen 500 Kanun Keseksaan.

Kemudian isu itu berkembang menjadi polemik baru apabila beberapa profesor mendakwa negara ini tidak pernah dijajah dan hanya menjadi naungan British.

Sementara itu, Ketua Dewan Pemuda PAS Nasrudin Tantawi pula berkata, penentangan terhadap penjajah bertujuan untuk memastikan akidah Islam terus terpelihara.

Malah beliau turut menolak teori Malaysia tidak pernah dijajah oleh kuasa asing.

“British datang ke Malaysia bukan untuk melawat suka-suka, tetapi mereka mengambil hasil

bumi kita dan menyebarkan dakwah Kritisianisasi yang berlanjutan daripada pergerakan Salibiah di Barat," katanya.

"Ulama-ulama zaman itu menentang penjajah demi mempertahankan akidah dan agama umat Islam daripada dakyah-dakyah penjajah Barat itu, namun golongan ini dianggap sebagai pemberontak oleh penjajah," tegas beliau.

Sementara itu, Pengarah Operasi Pusat Penyelidikan PAS Dr Zuhdi Marzuki berkata, sejarah penentangan golongan agama terhadap penjajahan British telah dihitamkan oleh pihak tertentu demi kepentingan peribadi.

Katanya, peranan golongan agama dalam menuntut kemerdekaan adalah penting dan tidak seharusnya dipadamkan dari lipatan sejarah.

Berkongsi pendapat dengan beliau, penulis dan pengkaji sejarah Riduan Mohd Nor yang berkata, hasil penyelidikan beliau menunjukkan gerakan Islam di seluruh dunia ketika itu telah mencetuskan gerakan penentangan terhadap penjajah demi kebebasan akidah umat Islam.

The Malaysian Insider

Hakcipta © 2011 The Malaysian Insider

Source: <http://www.themalaysianinsider.com/bahasa/article/pakar-polemik-sejarah-hanya-usaha-pertahan-ideologi-umno-pas/>